

Illoqarfimmi Nuummi killilersuigallarnerit inerteqquteqartitsinerillu pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-meersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 6 a aamma 12 a, 12 b kiisalu § 29, imm. 2 malillugit aalajangersarneqarpoq:

Atuuffi

§ 1. Nalunaarut illoqarfimmut Nuummut atuuppoq, taamaattoq takuuk imm. 2 aamma 3.

Imm. 2. Nalunaarut Dronning Ingridip Napparsimavissuanut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaanermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutingilaq.

Imm. 3. Nalunaarut katersuunnernut politikkikkut allatulluunniit isummersornissamik sunniiniarnissamik siunertalinnut atuutingillat.

Imm. 4. Nalunaarut eqqartuussisut pissaanermik atortitsinerannut atuutingilaq.

Pisortat suliffeqarfutaannut isersinnaaneq killilersuinerillu

§ 2. Suliffeqarfiit kulturimik sunngiffimmillu sammisallit, taakkununga ilanngullugit atuakkanik atorniartarfiit aamma katersugaasiviit pisortanit pigineqartut Nappaatinut tunillaassortunut inunnut iliuutsit pillugit Inatsisartut peqqussutaanni § 22, imm. 1-imut ilaanngitsut iniutitik tamanut matoqqatissavaat.

Ininut assigiinngitsunut isersinnaaneq killilersuinerlu

§ 3. Inuussutissarsiummik ingerlatallit ininik makkuninnga tamanut mattusseqqassapput:

- 1) Unnuklut klubbit, qitigiartarfiit, imerniartarfiit assigisaalu.
- 2) Neriniartarfiit, cafeet il.il., tuniniaaffiusumi nerisassanik sassaalliutigineqartunik nerisarfusut, aamma imigassanik sassaalliutigineqartunik imertarfusut, taamaattoq imm. 2 takuuk.
- 3) Sumiiffiit timersornermik ingerlatsiviit sunngiffimmillu sammisassaqaartitsiviit, taakkununga ilanngullugit timersoriartarfiit, nalunnguartaarfiit, sungiusariartarfiit, isiginnaartitsisarfiit filmeriartarfillu.
- 4) Kakiuisartut, iverusersuisartut, eqissisimaarluni uffariartarfiit, timigissartarfiit, pinnerasaarfiit tagiartuisarfillu, nujalerisut inillu allanut kiffartuussiviusartut ilusimikkut timimik qanimut attuiffusartut

palersaartarfillu.

Imm. 2. Neriniartarfiit sassaallertarfillu imm. 1, nr. 2, apeqqutaatinnagit aamma nerisassanik imeruarsaatinillu piariikkanik annissassanik pisiniartarfiit (take-away) tuniniaanissaq siunertaralugu tamanut ammatinneqarsinnaapput. Taamatuttaaq unnuisarfiit unnuisut ineeraannut nerisassanik aamma imeruarsaatinik pajuttuisinnaapput.

Angallassineq

§ 4. Angallassissutini issiaffusinnaasut sinnerlugit ilaasoqaqqusaanngillat. Oqaaseqatigiinnik siullernik eqqortitsinissaq angallassissummik piginnittup akisussaaffigaa.

Qanermut imaluunniit kiinnamut assiaquteqarnissamut piumasaqaat

§ 5. Inuit aqqaneq-marlunnik sinnerlugillu ukiullit kiinnamut assiaquteqassapput:

- 1) niuertarfinniippata aamma oqaluffinniippata.
- 2) bussiniippata imaluunniit taxaniippata.

Imm. 2. Qanermut imaluunniit kiinnamut assiaquteqarnissamut piumasaqaat ilisimassutsimik annikillimasunut, timikkut tarnikkulluunniit sanngiittunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atuutinngilaq.

§ 6. Qanermut assiaqutitut taaneqartut tassaapput qanermut qinngamullu assiaqut ataasiartakkat imaluunniit annoraaminermi assiaqutiliat allunaasamillu tasisartumilluunniit siutitut ikkuttartut imaluunniit niaqqup tunuatungaani qilertartut kiinnamullu attuumasut.

Imm. 2. Kiinnamut assiaqutitut tassaapput isinut, qanermut qinngamullu assiaqutitut plastikimik sanaat kiinnamut attuumanngitsut.

Pineqaatissiissutit

§ 7. Inuit § 2, § 3, imm. 1-imik, § 4 imaluunniit § 5, imm. 1-mik unioqqutitsisut Kalaallit Nunaannut Pinerluttulerinermik Inatsit malillugu pineqaatissinneqarsinnaapput.

Imm. 2. Ingerlatseqatigiiffiit il.il. (inatsisitigut pisussaaffillit) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsineq piffissarlu atuuffissaq

§ 8. Nalunaarut 28. maaji 2021-mi nal. 17:00 atuutilissaaq.

Imm. 2. Nalunaarut malillugu killilersuinerit, inerteqquteqarnerit, peqqusinerit il.il. 31. maj 2021 ilanngullugu atuutissapput.

Namminersorlutik Oqartussat, ulloq 28. maaji 2021

Kirsten Fencker
Peqqissutsimut Naalakkersuisoq

/ Aka Olesen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut